



KEMENTERIAN SUMBER ASLI, ALAM SEKITAR
DAN PERUBAHAN IKLIM
JABATAN ALAM SEKITAR

KENYATAAN MEDIA JABATAN ALAM SEKITAR

YBM NRECC TURUN PADANG BAGI PEMANTAUAN ADUAN PEMBAKARAN TERBUKA DI KAWASAN JOHAN SETIA, KLANG, SELANGOR

YB Nik Nazmi Nik Ahmad, Menteri Sumber Asli, Alam Sekitar dan Perubahan Iklim (NRECC) hari ini telah turun padang ke Kawasan Revolusi Hijau Johan Setia, Klang Selangor dengan diiringi oleh Dato' Wan Abdul Latiff Wan Jaffar, Ketua Pengarah Alam Sekitar bagi melihat dan memantau secara dekat berhubung aduan pembakaran terbuka di kawasan terbabit yang merupakan kawasan berisiko serta mudah terbakar (fire prone).

Bagi menangani kejadian kebakaran yang berlaku JAS telah mengambil langkah-langkah pencegahan melalui pelbagai aspek iaitu:

- a) Meningkatkan pemantauan dan rondaan operasi mencegah pembakaran terbuka melalui darat dan menggunakan *drone*;
- b) Mengambil tindakan tegas bagi kawasan kebakaran yang telah berlaku dan mengenalpasti pemilik tanah kawasan kebakaran yang terlibat untuk tindakan perundangan di bawah Akta Kualiti Alam Sekeliling, 1974;
- c) Bekerjasama dengan Jabatan Bomba dan Penyelamat bagi mengawal kes-kes kebakaran yang berlaku;
- d) Memantau bacaan dan tren IPU stesen pengawasan udara dari semasa ke semasa untuk tindakan selanjutnya; dan
- e) JAS turut giat mengadakan program kempen kesedaran awam terutama kepada pemilik peladang dan juga penduduk kampung agar tidak melakukan pembakaran terutama ketika cuaca panas dan kering melalui program-program komuniti dan tidak ketinggalan juga melalui media sosial dan media massa.

**Statistik Aduan Pembakaran Terbuka di Johan Setia
Bagi Tahun 2018 -2023**

Jumlah Aduan Pembakaran Terbuka Mengikut Tahun				
2019	2020	2021	2022	2023
95	64	73	15	33 kes sehingga Ogos 2023

Bagi kawasan Selangor yang mempunyai kawasan tanah gambut berkeluasan 173,198 hektar dan untuk kawasan Johan Setia yang juga berkeluasan 10,095 hektar dan merupakan kawasan berisiko terbakar, JAS melalui kerjasama rapat bersama agensi-agensi lain dalam mengawal kebakaran telah berkolaborasi untuk membina infrastuktur yang terdiri daripada 5 unit sekatan saliran (JPS), 3 unit telaga tiub (JMG) dan 16 unit piezometer (JMG).

Melalui pembangunan infrastuktur ini statistik aduan pembakaran terbuka bagi tempoh lima tahun di kawasan Johan Setia mencatatkan penurunan ketara iaitu sebanyak **69%** iaitu hanya **33** kes aduan dicatatkan bagi tempoh sehingga Julai 2023 berbanding tahun 2019 yang mencatatkan **95** kes aduan.

**Tindakan Penguatkuasaan Jabatan Alam Sekitar (JAS) di bawah Kesalahan Seksyen
29A di Johan Setia**

TAHUN	TINDAKAN PENGUATKUASAAN	BILANGAN
2019	Notis Arahan	23
	Kertas Siasatan	2
	Kompaun	10
2020	Notis Arahan	50
	Kertas Siasatan	1
	Kompaun	23
2021	Notis Arahan	13
	Kompaun	5
	Kertas Siasatan	6
2022	Notis Arahan	6
	Kompaun	5
2023	TIADA	

Bagi tahun 2023 **sehingga Ogos** statistik tindakan penguatkuasaan pembakaran terbuka di kawasan Johan Setia mendapati tiada sebarang ketidakpatuhan di bawah **kesalahan Seksyen 29A**.

Bagi menangani cuaca panas dan kering, setiap agensi yang terlibat dalam pengurusan bencana jerebu juga **telah mempertingkatkan usaha-usaha pencegahan ke atas aktiviti pembakaran terbuka** yang berpotensi menyebabkan jerebu di peringkat tempatan.

Selain itu, pihak Kerajaan Negeri dan Kerajaan Tempatan dan semua pemilik tanah dinasihatkan memantau secara rapi kawasan-kawasan yang mudah dan sering terbakar seperti tapak pelupusan sampah, hutan, tanah gambut, ladang, kawasan pertanian dan industri dan mengambil langkah-langkah untuk mencegah pencerobohan oleh pihak-pihak yang tidak bertanggung jawab sehingga menyebabkan pembakaran terbuka sama ada untuk tujuan tertentu atau dengan tidak sengaja.

NASIHAT KEPADA ORANG RAMAI

Semua pihak terus diingatkan agar tidak melakukan pembakaran terbuka atau membiarkan tanah atau premis kepunyaan mereka dimasuki atau dicerobohi oleh pihak-pihak yang tidak bertanggungjawab sehingga menyebabkan pembakaran terbuka untuk tujuan tertentu atau dengan tidak sengaja.

Tindakan tegas akan diambil kepada mana-mana pihak yang tidak bertanggungjawab menyebabkan pembakaran terbuka termasuk pemilik tanah. Di bawah Seksyen 29(A), Akta Kualiti Alam Sekeliling 1974, mereka yang disabitkan dengan kesalahan melakukan pembakaran terbuka boleh dikenakan denda tidak melebihi RM500,000 atau penjara selama tempoh tidak melebihi 5 tahun atau kedua-duanya sekali. Kompaun maksimum sebanyak RM2,000 juga boleh dikenakan atas setiap kesalahan.

Orang ramai juga diminta bekerjasama untuk memadam kebakaran-kebakaran kecil dan juga melaporkan kes-kes pembakaran terbuka atau kebakaran kepada Jabatan Perkhidmatan Bomba dan Penyelamat di talian **999** dan Jabatan Alam Sekitar (JAS) di talian bebas tol, **1-800-88-2727**. Sebarang kes kebakaran yang berlaku di kawasan perumahan hendaklah dilaporkan kepada Pihak Berkuasa Tempatan di kawasan masing-masing.

KUALITI UDARA 10 OGOS 2023

Indeks Pencemar Udara (IPU) yang direkodkan di laman web Jabatan Alam Sekitar pada hari ini **jam 5 petang** menunjukkan 43 kawasan mencatatkan status kualiti udara pada tahap baik dan 25 kawasan mencatatkan status kualiti udara pada tahap sederhana.

Tiada kawasan yang mencatatkan bacaan status kualiti udara pada tahap tidak sihat. Berdasarkan rekod JAS, IPU di Johan Setia ada merekodkan bacaan yang tidak sihat untuk beberapa jam pada 8 Ogos 2023 disebabkan oleh aktiviti pembakaran terbuka pada waktu malam dan sehingga hari ini, Johan Setia merekodkan bacaan IPU yang sederhana iaitu 63.

Bacaan IPU terkini setiap jam boleh dirujuk di laman web Jabatan Alam Sekitar (JAS) di alamat url, <http://apims.doe.gov.my/> atau dengan memuat turun aplikasi telefon pintar rasmi MyIPU di 'Google Play'.

Berdasarkan laporan oleh *ASEAN Specialised Meteorological Centre (ASMC)* pada 8 Ogos 2023, bilangan titik panas (hotspot) yang dikesan melalui imej satelit *National Oceanic and Atmospheric Administration (NOAA) 20* di Kalimantan, Indonesia adalah sebanyak 71 titik panas (hotspot), manakala 10 titik panas (hotspot) dikesan di Sumatera, Indonesia. Selain itu, sebanyak 3 titik panas (hotspot) dikesan dalam negara iaitu di negeri Sabah (3) akan disiasat dan diambil tindakan penguatkuasaan yang sewajarnya.

DATO' WAN ABDUL LATIFF BIN WAN JAFFAR

Ketua Pengarah Alam Sekitar Malaysia

10 Ogos 2023